

# 70 onns Terra Grischuna

Giubileum d'ina enconuschenta revista

■ (anr/gc) **Quest onn po la Terra Grischuna, uss revista per natira, cultura e temp liber en il Grischun, festivar ils 70. Chapaivel che la novissima ediziun (3/2012) fa menziun da quest fatg legrai-vel cun dar in sguard enavos sin il svilup permanent da quella ferma vusch dad e per il Grischun.** Il fundatur è stà Balz Fetz, vegnì a ses temps giu dal Grischun per lavurar a Basilea tar la duana. Dasperas era el anc president da l'uniun grischuna en quella citad. Ils emprims 180 exemplars èn vegnids scrits 1942 sin la maschina da scriver Hermes, producids a Basilea e tramess grautmain als Grischuns en la Bassa. La consorta da Balz Fetz è stada l'emprima secretaria da la chasa editura e prestava – sper anc esser mamma – gronda lavur per questa revista che custava alur 2 francs ad onn. A l'entschatta cumpareva ella 4 giadas ad onn – ussa sis.

## Organ uffizial da la Pro Raetia

La Terra Grischuna ha adina

promovì fitg il sa tegnair ensemble tranter ils Grischuns emigrads. Uschia ha la Terra Grischuna era fullà via 1949 a la fundaziun da la Pro Raetia – l'Associaziun dals Grischuns en la Bassa. Già 1952 – 10 onns suenter la fundaziun – aveva la Terra Grischuna 1600 abbonents. Da quel temp purtava ella novitads giu da la patria grischuna sper quellas da las uniuns dals Grischuns en la Bassa e tematikas impurtantas pertutgant il Grischun. 1955 s'avanza la Terra Grischuna a l'organ uffizial da la Pro Raetia. Quel onn era l'emprima ediziun, deditgada ad in tema, cumparida.

Fin 1957 è Balz Fetz stà tant redactor sco editur. Alur è Christian Walther vegnì engaschà sco redactor e mainafatschenta e restà 30 onns schefredactor da la Terra Grischuna.

## Oz in magazin

Già baud han ins dà gronda paisa

a l'illustraziun, cun il temp er en colur. 1972 è il fundatur ed editur, Balz Fetz, sa retratg, surdond la direcziun da la chasa editura da la Terra Grischuna a ses figl Reto Fetz. Vitiers ils lecturs grischuns da la Terra Grischuna èn adina era dapli giasts da noss chantun vegnids. Il dumber d'abonnents è dentant creschi sin pli che 15 000.

1982 – tar il giubileum da 40 onns – han ins midà la Terra Grischuna en in magazin modern: cun temas, magazin e gasetta – ed era cun ina pagina rumantscha dapi 30 onns cun *Rita Cathomas-Bearth*, *Gian Peider Gregori* ed uss *Daniel Tellì* sco redactors. La redacziun ha *Markus Joos* surpiglià 1988. Vitiers ils temas èn era purtrets da Grischuns vegnids. Cu Reto Fetz è vegnì pensiunà – suenter esser stà 40 onns editur – è la Terra Grischuna ida vi tar la Südostschweiz Print che vegn er ad edir ella vinavant sco in magazin bainfatg tschertgà ed apprezzià.